

- संविधान दिवस रे मौके आज देश-प्रदेश मांय न्यारा-न्यारा कार्यक्रम राख्यी ज्या-राष्ट्रपति द्रौपदी मुर्मू संविधान ने देश री नींव बतायो।
- केंद्रीय मंत्रिमंडल सिटर्ड रेयर अर्थ परमानेंट मैग्नेट बणावण ने बधावो देवण री योजना मंजूर कीनी।
- मुख्यमंत्री भजनलाल शर्मा कह्यो- सरदार वल्लभ भाई पटेल आगे री सोच ऊँ रियासतां ने एकजुट कर रे देश बणावण मांय खास काम कीनी।
- उत्तरी बायरा रे कारण प्रदेश रा मैदानी हलकां मांय ठण्ड रो असर बध्यो-सैर-सपाटा री पहाड़ी ठोड़ां पारो थोड़ी चढ़्यो।

000

आज संविधान दिवस हरक उमाव सागे मणायी ज्यो। ई मौके राष्ट्रपति द्रौपदी मुर्मू नई दिल्ली रा संविधान सदन रा केंद्रीय कक्ष मांय संविधान री प्रस्तावना बांची। ई मौके वे कह्यो के संविधान देश री ओळखाण री नींव है अर देश ने आगे बधावण अर गुलामी री सोच हटा र राष्ट्रवादी नज़रियो स्थापित करण रो गेलो बतावण वाळो ढाँचो है।

कार्यक्रम मांय लोकसभा अध्यक्ष ओम बिरला कह्यो के संविधान रा बताया गेला ऊँ देश सुशासन, सामाजिक अर माली विकास री लगातार बदल रही यात्रा माथे चाल रह्यो है। लोकसभा अध्यक्ष संविधान सभा रा सगळा सदस्यां सागे सभा रा अध्यक्ष डॉ. राजेंद्र प्रसाद अर संविधान बणावण वाळा रा तौर ऊँ डॉ. भीमराव अंबेडकर ने ई सिरधाभाव सागे याद कीना। प्रधानमंत्री नरेन्द्र मोदी संविधान बणावण वाळां ने सिरधाभाव सागे याद करता थकां कह्यो के वां री आगे री सोच देश रा हर रहवासी ने विकसित भारत बणावण री सीख देती रेहवेला। राज्य मांय ई मौके भांत-भांत रा कार्यक्रम राख्यी ज्यो। पुलिस मुख्यालय मांय पुलिस महानिदेशक राजीव कुमार शर्मा अहलकारां अर कर्मचारियों ने संविधान री शपथ दिरायी अर सगळा मिल र संविधान री प्रस्तावना बांची। झुंझुनूं मांय ई पुलिस रा अहलकार अर कर्मचारी संविधान रा मान अर कर्तव्यां री पालना करण री शपथ लीनी। बालोतरा ज़िला री स्कूलां मांय मतदाता साक्षरता क्लब रा तैत विद्यार्थियां ने संवैधानिक अधिकार, कर्तव्य अर वोट देवण रा महत्त्व रा बारा मांय जाणकारी दीरीजी। सर्वाईमाधोपुर अर सिरौही ज़िलां मांय ई **“हमारा संविधान-हमारा स्वाभिमान”** मुद्दा माथे संगोष्ठी, निबंध अर वाद-विवाद री होड़ां समेत न्यारा-न्यारा कार्यक्रम राख्यी ज्यो।

केंद्रीय मंत्रिमंडल 7 हजार दो सौ अस्सी करोड़ रुपया रा खर्च वाळी सिटर्ड रेयर अर्थ परमानेंट मैग्नेट रा विनिर्माण ने बधावो देवण री योजना ने मंजूरी दे दीनी है। इण रो मकसद देश मांय हर साल छह हजार मीट्रिक टन इंटीग्रेटेड रेयर अर्थ परमानेंट मैग्नेट बणावण रो काम सरु करणो है। सूचना अर प्रसारण मंत्री अश्विनी वैष्णव नई दिल्ली मांय व्ही केन्द्रीय मंत्रिमंडल री मीटिंग पाछे इण मांय करी ज्यो फैसलां री जाणकारी देता थकां आ बात बतायी।

वे बतायो के घणो कम मिलण वाळो परमानेंट मैग्नेट सब ऊँ मज़बूत परमानेंट चुम्बक मांय शामिल है अर बेटरी ऊँ चालण वाळी गाड़ियां, अक्षय ऊर्जा, इलेक्ट्रॉनिक्स, एयरोस्पेस अर डिफेंस एप्लीकेशन मांय घणो ज़रूरी है।

000

लोकसभा अध्यक्ष ओम बिरला कह्यो है के संघ लोक सेवा आयोग देश रा प्रशासनिक ढांचा ने मज़बूत बणायो है। श्री बिरला नई दिल्ली मांय यू.

पी.एस.सी. रा शताब्दी वर्ष समारोह मांय बोल रहया हा। वे कह्यो के आ संस्था ऐड़ी पीढ़ियां तैयार करेला जो देश बणावण वाळां रा तौर ऊँ काम करेला अर भारत ने विकसित अर दुनिया मांय अगाड़ी

देश बणावण री दिशा मांय गेलो बतावेला। लोकसभा अध्यक्ष कह्यो के यू.पी.एस.सी. दुनिया मांय एक साफगोई सागे काम करण वाळी संस्था मानी जावे है।

000

मुख्यमंत्री भजनलाल शर्मा नौजवानां ऊँ सरदार पटेल री जिन्दगी ऊँ सीख ले र 'राष्ट्र प्रथम' री भावना ने सब ऊँ ऊँची राखण री अपील कीनी है। वे जयपुर री अमर जवान ज्योति ऊँ **सरदार/150 यूनिटी मार्च** रा तैत यमुना प्रवाह यात्रा ने हरी झंडी बता र रवाना करण रे मौके बोल रह्या हा। मुख्यमंत्री कह्यो के सरदार वल्लभ भाई पटेल आगे री सोच अर हिम्मत वाळा फैसलां ऊँ 562 रियासतां ने एकजुट कर र देश बणावण मांय खास काम कीनो। श्री शर्मा कह्यो के प्रधानमंत्री नरेन्द्र मोदी जम्मू-कश्मीर ऊँ धारा 370 रा प्रावधान हटा र सरदार पटेल रो अधूरो सपनो पूरो कीनो है।

000

उपमुख्यमंत्री दिया कुमारी आज जयपुर मांय फौजी टेशन रा गांडीव स्टेडियम मांय स्पेशल ओलंपिक्स स्टेट गेम्स एथलेटिक्स रो उद्घाटन कीनो। ई मौके उपमुख्यमंत्री कह्यो के स्पेशल ओलंपिक्स विशेष बच्चां री की प्रतिभा ने आगे लावण रो मंच है। वे समाज अर मायतां ऊँ आं बच्चां ने बत्ता ऊँ बत्ता मौका देवण री अपील कीनी। उद्घाटन समारोह मांय प्रदेशभर रा स्पेशल एथलीट्स मार्च-पास्ट कीनो। इण मांय राजस्थान रा ई 300 ऊँ बत्ता बच्चा भाग ले रह्या है। आं खेलां ऊँ चुण्या जावण वाळा एथलीट स्पेशल नेशनल ओलंपिक्स मांय खेलेला।

ई पाछे वे चिली मांय व्हेवण वाळा इंटरनेशनल स्पेशल ओलंपिक्स मांय भारत री नुमाइन्दगी करेला। सप्त शक्ति कमांड रा आर्मी कमांडर लेफ्टिनेंट जनरल मनजिन्दर सिंह कह्यो के ऐड़ा आयोजन बच्चां रो खुद मांय भरोसो बधावे है।

000

राजस्थान लोक सेवा आयोग कानी ऊँ करी ज्यो **'आवेदन विड्रॉ'** नवाचार असरदार साबित व्ह्यो है। आयोग रा अध्यक्ष उत्कल रंजन साहू बतायो के ई फैसला ऊँ न केवल सरकारी खजाना री मोटी रकम बची है बल्कि भर्ती रा काम मांय ई तेजी आयी है। **'आवेदन विड्रॉ'** नवाचार रा तैत उम्मीदवार अर्जी पाछी ले सके है। ई पहल पाछे न्यारी-न्यारी भर्ती परीक्षावां मांय मोटी तादाद मांय अर्जियां पाछी लीरीजी है। एकली सीनियर टीचर भर्ती परीक्षा ऊँ 46 हजार उम्मीदवार अर्जियां पाछी लीनी।

000

रणथम्भौर राष्ट्रीय उद्यान मांय पर्यटन सफारी ने व्यवस्थित करण सारु वन विभाग आज सैलाणियां ने ले जावण वाळी गाड़ियां मांय ट्रैकिंग सिस्टम सुरु कर दीनो। ई पाछे अब सैलाणी वां री गाड़ियां री ठौड़ री ठा कर सकेला। म्हाणा सवाईमाधोपुर खबरनवीस बतायो के इण ऊँ सैलाणियां रो टेम बचेला।

000

ऊर्जा मंत्री हीरालाल नागर आज जयपुर मांय दो दिन रा ग्लोबल सोलर एक्सपो 2025 रो उद्घाटन कीनो। ई मौके वे कह्यो के राजस्थान अक्षय अर सौर ऊर्जा रा हलका मांय देश रो आगाड़ी राज्य बण ग्यो है। नागर कह्यो के प्रदेश मांय सूरज री रोशनी ऊँ बिजली बणावण रो बूतो 35 हजार 357 मेगावॉट ताई पूग ग्यो है, जिण मांय लारला दो साल मांय करीब 19 हजार मेगावॉट री बधोतरी व्ही है। मंत्री कह्यो के पी.एम. कुसुम योजना किसानां ने अन्नदाता सागे ऊर्जादाता ई बणाया है। कार्यक्रम मांय ऊर्जा विभाग रा प्रमुख शासन सचिव अजिताभ शर्मा कह्यो के कुसुम योजना रा कॉम्पोनेंट-ए मांय राजस्थान देश मांय अबल है।

000

गोवा मांय चाल रह्या 56वां भारतीय अंतर्राष्ट्रीय फिल्म उत्सव मांय आज **'एक डायरेक्टर की बेस्ट डेब्यू फीचर फिल्म'** श्रेणी रा तैत मैक्सिको री नाटकीय फिल्म— **द डेविल स्मोक्स एंड सेक्स द बर्न मेचेज़ इन द सेम बॉक्स** बतायी ज्यी। इण रा निर्देशक अर्नेस्टो मार्टिनेज बुसियो फिल्म रा प्रीमियर मांय शामिल व्ह्या अर जळसा रो हिस्सो बणबा माथे खुशी जतायी। ई फिल्म ने 2025 बर्लिनले अंतर्राष्ट्रीय फिल्मोत्सव मांय बेस्ट फर्स्ट फीचर फिल्म रा ईनाम ऊँ नवाजी जा चुकी है।

000

प्रदेश मांय उतराद हलकां ऊँ आ रह्या सीळा बायरा ऊँ मैदानी हलकां मांय सर्दी रो असर बध्यो है, जद के पहाड़ी ठौड़ां पारो थोड़ो चढ्यो। राज्य मांय सैर-सपाटा री एकली पहाड़ी ठौड़ माउंट आबू मांय लारला दिनां री तुलना मांय ठंड ऊँ मामूली साता मिली है। वठे पारो जमाव बिन्दु रे आरे-सारे चाल रह्यो हो जो आज चढ़ र 5 डिग्री सेल्सियस ताई पूग ग्यो। दूजी कानी कोटा मांय बाज रह्या

सीळा बायरां ऊँठण्ड रो असर बध ग्यो। वठे संवारे री पोर हल्की धुंवर रही अर 10 बज्यां तांई ई तावड़ो नी निकळ्यो। जयपुर मांय आज पारो उत्तर र 11 दशमलव 6 डिग्री सेल्सियस दर्ज करीज्यो। मौसम विभाग आवता दिनां पारा मांय और उत्तर चढ़ाव रा आसार जताया है।

000

प्रधानमंत्री नरेन्द्र मोदी 30 नवम्बर दीतवार ने आकाशवाणी ऊं प्रसारित कर्या जावण वाळा खास कार्यक्रम “मन की बात” मांय विचार बतावेला। आ हर महीना प्रसारित कर्या जावण वाळा ई कार्यक्रम री 128वीं कड़ी व्हेला। ई सारु राय 28 नवम्बर तांई मुफ्त नम्बर 1800—11—7800 माथे दी जा सके है। नरेन्द्र मोदी एप अर माय जीओवी ओपन फोरम रे जरिये ई विचार दिया जा सके है।

000